


吾學編

四冊


十一



孫國記

漢書門
類
號
函
架
冊
三〇
五六

內閣文庫	
番號	漢 8864
冊數	30(4)
函號	290 10





建文遜國記敘

嘗觀詩書所載家國興亡必有其自蓋天人相符

非幸與不幸適然致也三代而下一統繼世惟秦

隋自速敗秦之暴橫隋之奢淫亡非天也讀遜國

記竊怪建文君無一於此何以遽亡

高皇帝再造乾坤功德光三代陵土未乾材臣宿

將猶存邊隅無故宴然廢甲成康之積也

文皇南來忽於破竹何也人咸咎方黃謀國之疎

或曰漢文天授少帝雖輔以伊姜亦胡能存然歟

夫天與子後嫡長未有善繼者湯傳孫文王舍伯

建文遜國記敘

邑考扶蘇終上谷漢惠無嗣隋殺楊勇唐宗由秦王宋至孝宗始嗣太祖

文皇亦然天之定命自古識之矣建文君臣何尤乎居升之疏禍迫於鼃錯信乎天也天有所興孰能無廢翁故考之編年參之野史為遜國記以備遺缺傳曰鑒於后羿而用德度經曰勤用明德庶邦丕享作者意也時

嘉靖丙寅春中既望進士臣鄭履淳謹敘

建文遜國記

吾學編第十一

海鹽鄭曉

建文皇帝諱允炆太祖之孫懿文太子之子也洪武十年十一月巳卯生生六年而其兄雄英卒又十年而懿文卒高祖年六十有五矣御東角門對群臣泣翰林學士劉三吾進曰皇孫世適富於春秋正位儲極四海繫心皇上無過憂高皇曰善是年九月庚寅立為皇太孫詔曰曩者列聖相繼馭宇者首建儲君朕甲辰即王位戊申即帝位於今二十五年矣前者選將練兵奠生民於

田野統一以來除奸貪法豪強用心多矣邇來蒼
顏皓首儲嗣爲重九月十三日冊適孫允炆爲皇
太孫奉上下神祇以安黎庶太孫英明仁厚好文
章典禮旣爲太孫中外萬幾時付裁決當是時政
治嚴覈太孫濟以寬大中外欣欣愛戴以宋國公
勝穎國公友德兼太子太師曹國公景隆涼國公
玉太子太傅開國公昇全寧侯恪太子太保詹徽
太子少傅兼吏部尚書茹瑺太子少保兵部尚書
任亨太子少詹事兼翰林修撰杜澤楚樟詹事丞徽
等以下支兼官俸又以兵部尚書致仕唐鐸刑部
尚書楊靖兼太子賓客又命廷臣舉孝義篤行之
士鄭濟王勲爲左右庶子二十九年八月詔更議
諸王見東宮禮禮官曰諸王來朝冕服見天子畢
次見東宮已有定議其敘家人禮王及東宮俱常
服引禮官請王由文華殿東門入至後殿王西向
東宮東向贊禮官贊四拜王坐受相見禮畢叙坐
則東宮正中南向諸王列于東西奏上從之三十
一年閏五月乙酉遺詔曰朕受皇天之命膺大任
於世定禍亂而偃兵安生民於市野謹撫馭以膺
天命三十有一年憂危積心日勤不怠專志有益

於民柰何起自寒微無古人之博智好善惡惡不
及多矣今年七十有一筋力衰微朝夕危懼慮恐
不終今得萬物自然之理其奚哀念之有皇太孫
煥文仁明孝友天下歸心宜登大位以勤民政中
外文武臣僚同心輔佐以福吾民塋祭之儀一如
漢文帝勿異布告天下使知朕意孝陵山川因其
故無改諸王臨國中無得至京王國所在文武吏
士聽朝廷節制惟護衛官軍聽王諸不在令中者
推此令從事丙戌令禮部議喪禮辛卯皇太孫即
皇帝位詔曰天降下民作之君我皇太祖高皇帝
受天明命統有萬邦宵衣旰食弘濟斯民凡事有
益于天下者無所不用其心政教休明規模宏遠
朕以眇躬纂承大統恭依遺詔於洪武三十一年
閏五月十六日即皇帝位夙夜祗懼思所以克相
上帝寵綏四方以無忝我皇祖之大命永維寬
猛之宜誕布維新之政其以明年爲建文元年大
赦天下於戲德惟善政政在養民當遵先聖之言
期致雍熙之盛百辟卿士體朕至懷是日塋孝陵
丙申詔內外五品以上文官及縣令薦賢才定
保舉連坐法是月上皇祖考大行皇帝謚曰高

皇帝廟號太祖 皇祖妣孝慈皇后曰高皇后尊
母皇太子妃呂氏爲皇太后議革冗員以中書舍
人蹇義爲吏部右侍郎戶部主事夏原吉爲本部
右侍郎兵部尚書齊太常寺卿黃子澄預祭國
事以平江知縣陳彥回爲徽州府知府秋七月召
漢中府學教授方孝孺爲翰林侍講召董倫爲禮
部左侍郎兼翰林學士命曹國公景隆即訊周王
逮至京廢爲庶人以王紳爲國子祭酒以張鳳李
衡趙福張弼汪濱孫端王斌楊忠林良李成張敏
劉政爲錦衣衛世千百戶有差鳳等皆西宮殉葬
宮人父兄所謂朝天女戶也八月進魏國公輝祖
曹國公景隆祿秩勅輝祖練兵山東召王景彰爲
禮部右侍郎兼翰林侍講尋陞學士以雲南左布
政使張統爲吏部尚書徵江西處士楊士奇克實
錄編纂官尋授齊府審理副仍留翰林編纂罷禮
部尚書鄭沂以雲南布政使陳迪爲禮部尚書以
臨江府推官劉翼爲知府以劉儁盧淵爲兵部左
右侍郎以何福爲征虜將軍總兵征百夷都督徐
凱副之九月罷築銅鼓衛城召輝祖還京安陸侯
吳傑亦召還京長星西隕有聲如雷雲南總兵官

征虜前將軍西平侯汰春卒以馬京為大理卿冬
十月何福進兵金齒討諸蠻尋平之以戴元禮為
太醫院使召北平總兵都督楊文還京十一月征
南將軍總兵都督僉事顧成征五開還兵常德命
錦衣指揮談全諭成班師賞勞成及其副將何清
宋晟韓觀有差十二月朔帝省牲郊壇是歲監察
御史解縉來奔喪謫河州衛吏以工部侍郎張昂
掌北平布政司事謝貴為北平都指揮使王鈍為
戶部尚書召鄭賜於安東起徒中為工部尚書起
流人劉有年為太平知府以曾鳳韶為監察御史
以右都督沐晟嗣西平侯總兵鎮守雲南召宋濂
孫懌還京以為翰林侍書罷北平山東河南山西
陝西五省及淮安徐州學校貢士以國子學錄張
智為司業皇子學訓導鄒緝為助教召韓宜可為
副都御史何福以平蠻功陞右府都督同知以燕
府訓導康汝楫為安岳知縣詔求直言舉山林巖
穴懷材抱德之士監察御史尹昌隆上書請勤政
帝嘉納曰朕過也詔禮部頒天下使明知朕過調
僉都御史劉觀為嘉興知府盡釋刺面軍及徒人
還鄉里

巳建文元年革除稱洪武三十二年春正月庚辰大祀天地
於南郊始奉太祖高皇帝配先是戊寅上御奉
天殿誓戒百官是夕遂宿於文華殿齋宮巳卯出
舍皇邸尚膳進素食庚辰子夜行事帝脫烏登大
祀殿秉圭奠瓚興俯拜跪如禮昧爽還宮御奉天
殿受群臣賀方孝孺進郊祀頌詔養老賜高年米
絮帛有差命官贖民粥子減田租遣使告即位于
天下神祇何福班師還京勅修太祖高皇帝實
錄禮部左侍郎兼翰林學士董倫右侍郎兼翰林
學士王景彰為總裁官太常少卿廖昇翰林侍講
學士高巽志副總裁翰林修撰李貫國子博士王
紳漢中府學教授胡子昭齊府審理副楊士奇崇
仁縣學訓導羅恢馬龍他郎甸長官司吏日程本
立等為纂修官二月都督韓觀練兵於德州詔尊
考妣為皇帝后祔享宗廟立妃馬氏為皇后封弟
允熲允燈允熿為王詔曰朕惟有盛德而不享其
報者必垂慶于後昆履大位而不逮乎親者必致
尊于宗廟此天下之至理古今之通義也昔我
太祖高皇帝平定天下承千載之大統皇考懿
文皇太子蚤登儲位參決萬機默施寬仁陰贊至

治視民如子錫祐朕躬。太祖奄棄臣民肆朕嗣
登大位既謚太祖爲高皇帝。孝慈皇后爲高
皇后而皇考謚號未稱心切悼焉邇者採群臣
之言追尊皇考爲孝康皇帝廟號興宗皇妣懿敬
皇太子妃爲孝康皇后擇日祔廟群臣復謂中宮
之號未正無與共承祭祀諸第之封未定無以夾
輔邦家繼以爲請已冊妃馬氏爲皇后封弟允熲
爲吳王允燧爲衡王允熿爲徐王夫尊親所以崇
孝敬之道正家所以厚風俗之源嘉與萬方同臻
至治宗祖廟謚稱號所以褒顯功德非所當諱今
後惟廟諱如律迴避廟謚稱號勿諱民間及山林
岩穴有懷才抱德練達政治廉能幹濟之士有司
明著實跡禮請來京授以祿位共安黎庶軍民男
婦有八十九十者賜米一石肉十斤酒三斗九十
者加賜帛一疋綿一斤若身犯杖以上隸卒倡優
不與所在鰥寡孤獨貧無產不能自存者有司歲
給米三石令親戚收養無親戚里隣養之母令失
所其有田地荒蕪無人耕種者除其徭賦農桑衣
食之本有司勿奪民時使得盡力足其衣食學校
風化之源教養英俊以備任用有司宜加意勸勉

禁其習於浮靡務得真材以輔至治民之休戚係
守令賢否官之清濁在考覈公平在內監察御史
在外布政按察司宜公考察果政蹟異常及闕茸
不才奏聞黜陟軍民義夫節婦孝子順孫及同居
共爨五世以上鄉黨稱其孝義者有司勘聞旌表
軍民凡有嫁娶喪葬窮窘不能自舉者部伍鄰里
宗族相資助勿使失所水旱災傷速開報踏勘賑
濟軍中孤兒給糧存恤有定例其篤廢殘疾無人
侍養及年老有丁代役者管軍官宜加撫恤願還
鄉者聽民間有篤廢殘疾不能自存者收養濟院
例支衣糧使遂其生前代兵後骸骨暴露尚多當
掩骼埋斃之時所在軍民官司即便收瘞衛所勾
軍有司照名發與果戶絕即與除伍進封江都郡
主爲公主以儀賓耿璿爲駙馬都尉都督僉事宋
晟總兵鎮守甘肅以周是修爲衡府紀善更定官
制陞六部尚書正一品設左右侍中各一人位侍
郎上改戶部四司爲民度支金帛倉庾刑部四司
爲詳憲比議職門都官六部司去清吏字罷左右
都御史設都御史一人副僉都御史各一人改通政
司爲寺通政使爲通政卿通政叅議爲少卿寺丞

增置左右補缺左右拾遺各一人復置大理寺改
為司卿為大理卿左右寺正為都評事寺副為副
都評事司務為都典簿改太常寺卿為太常卿少
卿寺丞分左右又改天壇祠祭署為南郊祠祭署
泗州祠祭署為泗濱祠祭署宿州祠祭署為新豐
祠祭署又增鍾山祠祭署及司圃所改光祿寺卿
為光祿卿少卿寺丞分左右而陞少卿從四品省
署丞二人增監事二人改太僕寺卿為太僕卿增
典廐典牧二署設驕驥十五群遂生三群分隸二
署增少卿寺丞各一人詹事府增少卿寺丞各一
人賓客二人又置資德院設資德一人資善二人
其屬贊讀贊書著作郎各二人掌籍典簿各一人
增司業二人省博士學正學錄增助教十七人改
鴻臚寺卿為鴻臚卿分少卿寺丞為左右翰林院
增承旨一人學士一人文學博士二人省侍講侍
讀學士置文翰文史二館文翰館設侍書而改中
書舍人為侍書文史館設修撰編修檢討改謹身
殿為正心殿設學士一人改殿閣坊大學士為學
士文淵閣設典籍二人革六科左右給事中改五
城兵馬指揮司為五城兵馬司指揮副指揮為兵

馬副兵馬革左右布政使設布政使一人布政司
堂上官各陞一級改按察司爲十三道肅政按察
司改廣東鹽課司爲都轉運鹽使司革五軍斷事
官及稽仁稽義稽禮稽智稽信五司官增親王官
賓輔二人正三品伴講伴讀伴書各一人長史一
人左右長史各一人審理正典膳正奉祠正良醫
正典寶正並去正字審理副等改爲副審理等郡
王賓友二人正四品教授一人記室二人直史一
人左右直史各一人吏目一人典印典祠典禮三
署典印典祠典禮各一人典饌典藥二署典饌典
藥各二人典禮署引禮舍人三人儀仗司吏目一
人賓輔三伴賓友教授進對侍坐稱名不稱臣見
禮如賓師北平按察副使張璉坐藩府事謫典史
北平右布政使曹顯坐罪削籍是月王來朝行
皇道入登陛不拜監察御史曾鳳詔劾王不敬戶
部侍郎卓敬上書論劾皆不報免民賃舍錢革松
番衛三月丁亥帝祀先師於太學盥獻拜跪禮如
廟社御彝倫堂見師生賞幣鈔有差以散騎常侍
張成等七十一人爲海上巡檢勅布按二司官糾
察屬吏革畧陽縣是月成祖還國燕世子及其

弟高煦高燧留京師未幾遣還北平俄北平按察
僉事湯宗上變告言按察使陳瑛密受燕府金錢
有異謀逮瑛安置廣西燕山左護衛百戶倪諒亦
上變告逮府中官旗于諒周鐸等伏誅遂勅都督
宋忠率兵三萬及燕府護衛健卒屯開平名備胡
都督徐凱練兵臨清都督耿瓛練兵山海關召燕
府胡騎指揮關童等還京調北平永清兩衛官軍
屯彰德順德戶部右侍郎夏原吉給事中徐思勉
等二十四人充採訪使巡行天下問民疾苦興廉
黜貪得便宜行事京師地震監察御史尹昌隆上
疏斥爲福寧知縣夏四月革南丹衛附慶遠召湘
王栢於荊州栢自焚卒齊府人曾名深上變告召
齊王榑至廢爲庶人留京師誅其護衛指揮柴真
等未幾幽代王桂於大同繫岷王榷於雲南並廢
爲庶人當是時成祖威名最盛於諸王最長地
勢形便兵力又最强朝廷深疑之齊泰黃子澄徐
輝祖侍郎卓敬日夜謀所以防燕者會燕長史葛
誠教授余逢辰亦稍洩其謀張昺謝貴馬宣彭二
每遇中朝使者至北平亦頗傳語言謂宜早爲備
成祖固知之自京師歸即托疾久之遂稱病篤大

暑圍火爐。搖頭曰：寒甚，寒甚。宮中亦杖而行。朝廷稍不爲意。誠逢辰密告。昺貴曰：殿下本無恙，公等勿解防恐。一旦不可測也。而三都督密謀益急。五月，選補儒學官。先是學官缺，用舉人及中試監生。通經儒士至是，詔天下凡在任未入流官及坐法謫戍已更者，但通經薦試。俄又詔衛官舉通經軍士。聽布按二司試。上吏部銓用。岳池教諭程濟上書言有大難起宗室中，下獄。省連山縣入連州。以戴德彝爲左拾遺。宋徵宗人府經歷錢芹，戶部司務王叔英，翰林修撰。六月，省興濟縣入青縣。置千戶所於戎縣。以開平王甥趙諒爲留守。左衛指揮僉事是月召解縉于河州，以爲翰林待詔。秋七月甲戌，成祖兵起。號靖難。北平掌布政司事侍郎張昺都指揮使謝貴、彭二、燕府長史葛誠教授余逢辰死之。遂奪省城九門都指揮使俞瑱，走居庸。關馬宣走薊州。宋忠率師至居庸，關退保懷來。留瑱守關。成祖上書言：皇考太祖高皇帝艱難百戰萬死，一生定天下。成帝業傳之萬世，封建諸子，鞏固宗社。爲磐石安，不幸皇考賓天，陛下嗣承大寶，而姦臣齊恭、黃子澄輩，包蓄禍心，恣讒奮

毒假陛下之威權剪皇家之支葉櫛搏栢桂梗五
第不數年間並見削奪雖有愆過未聞不軌輒削
王爵奪王土轉徙流離行路矜惻栢尤可憫闔室
自焚聖仁在上胡寧忍此蓋非出陛下之心皆姦
臣所爲也心尚未足又以加臣臣守藩于燕二十
餘年寅畏小心奉法循分陛下嗣統以來臣事君
之誠明於皎日誠以君臣大分骨肉至親恒思加
慎爲諸王先而姦臣跋扈蔽陛下之聰明誣直爲
枉加禍無辜執臣奏事人箠楚刺焚備極苦毒迫
言臣謀不軌遂分布宋忠謝貴張昂等於北平城
內外甲馬馳突於街衢鉦鼓喧鞞於遠邇圍守臣
府周匝嚴密小大凜凜如臨湯火已而護衛人執
貴昂始詢知奸臣欺詐之謀號地呼天擗踊無訴
竊念臣於懿文皇太子同父母兄弟也今事陛
下如事天也權姦之心不止害臣譬伐大樹先剪
附枝親藩夷滅朝廷孤立姦臣得志社稷危矣伏
望陛下廓日月之明奮雷霆之斷渙發德音去此
兇慝以肅清朝廷以永安宗社以保全親藩遙仰
天門敬攄愚懇惟陛下念之臣又竊計姦權之黨
必已蟠結深固恐陛下未易除之伏觀祖訓有

云如朝無正臣內有姦惡則親王訓兵待命天子
密詔諸王統領鎮兵討平之臣謹俯伏俟命惟陛
下念之念之甲戌通州衛指揮房勝以城降燕丙
子北平都指揮使馬宣起兵薊州不克死之毛指
揮遂以薊州降燕遵化衛指揮蔣玉密雲衛指揮
鄭亨又各以其城降燕己卯瑱師潰於居庸退依
忠於懷來甲申成祖攻懷來忠敗績及瑱被獲
都指揮彭聚孫泰戰死都指揮莊得敗走丙戌永
平指揮趙彛郭亮以城降燕庚寅大寧總兵劉貞
都督陳亨都指揮卜萬引大寧兵號十萬出松亭
關駐沙河進攻遵化壬辰成祖援遵化貞等退
保松亭關亨陰輸款於燕忌萬不敢發成祖間
萬貞亨縛萬下獄聞於朝籍萬家是月以長興侯
耿炳文爲征虜大將軍駙馬都尉李堅都督審忠
爲左右副將軍帥師北進詔天下曰朕奉高皇
帝遺詔纂承大統宵衣旰食思圖善以安民豈意
國家不幸骨肉之親屢謀僭逆去年周庶人櫛潛
爲不軌辭連燕齊湘三王朕以親親之故不忍暴
其過止正櫛罪餘皆不問今年齊王榑謀逆事覺
推問犯者又言與湘王栢某王某同謀大逆栢自

知罪惡難逃先已自焚死樽已廢爲庶人朕以某
王於親最近未忍究其事今乃稱兵犯闕不得已
遣長興侯耿炳文等率兵三十六萬往討其罪咨
爾中外臣民軍士各宜懷忠守義與國同心永安
至治祭告天地宗廟社稷書諭諸王削燕屬籍時
帝方銳意文治日與孝孺等討論周官法度以爲
北兵不足憂黃子澄謂北兵素強且兼有營薊之
旅不早禦之恐河北遂失又請命安陸侯吳傑江
陰侯吳高都督都指揮盛庸潘忠楊松顧成徐凱
李文陳睥平安等各率偏師步騎號百萬數道並
進期直搗北平檄山東河南山西三省合給軍餉
省礮嘉臨西睢寧三縣和曲祿勸二州勅令京朝
官請告歸省給勘合內府以京口驛隸京師睢陳
歸德三州直隸河南布政司徵謫戍指揮僉事伏
顯等入京復其官置平燕布政使司于真定刑部
尚書暴昭掌布政司事贈故翰林待制王禕爲翰
林學士謚文節徵雲南兵入京備征八月炳文兵
三十萬至真定都督徐凱兵十萬駐河間都督潘
忠楊松先鋒駐鄭州壬子中秋夕 成祖率衆渡
白溝河圍雄縣破其城盡殺守裨卒屠其民潘忠

楊松兵渡月樣橋接戰遇伏大敗被執。成祖遂進至鄭州奪戰馬輜重炳文部將張保降燕言炳文兵三十萬先至者十三萬分營滹沱河南北。成祖厚撫保遣歸詐言兵敗被執幸守者困得脫竊馬歸又令言雄鄭敗狀燕兵旦夕且至令河南兵北移得併力破之易炳文聞保言果移南營過河壬戌。成祖至真定炳文出城逆戰敗績兩副將軍李堅審忠及都督顧成河托都指揮劉燧皆被執成降燕丙寅。成祖攻真定不克還北平是月以曹國公景隆爲征虜大將軍馳至軍中會諸將北進帝聞炳文敗績始有憂色謂子澄曰柰何子澄對曰勝敗兵家常事無足慮今天下全盛士馬精強兵甲堅利糧餉充足區區一隅豈足當天卜之力調兵五十萬四面攻之衆寡不敵必成擒矣曰孰堪將者子澄曰景隆可以當之前不用炳文而用景隆豈有此失遂遣景隆代炳文谷王穗自宣府還京齊泰等慮遼王植寧王權通燕召二王還京遼王至寧王不至詔削權護衛監察御史韓郁上書乞罷北征兵不聽九月江陰侯吳高都指揮耿瓛楊文帥遼東兵圍永平大將軍景隆乘

傳至德州山東叅政鐵鉉調兵食景隆合兵五十萬進營河間成祖率衆援永平高等退保山海關安陸侯吳傑兵潰於真定傑遁還京謫爲南寧衛指揮使冬十月成祖出劉家口襲破大寧都指揮朱鑑死之都指揮房寬寧王權皆降燕劉貞陳亨自松亭關引兵來援亨及營州中護衛指揮徐理陳文襲貞破其營貞遁廣寧浮海還京景隆聞成祖攻大寧引兵渡蘆溝橋攻北平築壘九門景隆攻麗正門幾破城中婦女並乘城擲瓦石景隆令不嚴驟退北平守益堅景隆別將攻通州敗績甲寅成祖盡拔大寧諸軍及兀良哈三衛胡騎挾寧王入松亭關趣援北平十一月庚午景隆移營白河西先鋒都督陳暉渡河而東遇成祖戰敗績景隆七營兵合戰皆潰景隆盡棄其輜重拔其衆南奔駐德州癸酉九門兵皆潰乙亥成祖再上書言臣叨奉宗藩見惡權姦橫加大惡上書自陳今歷三月未蒙垂察疊發大兵討罪不已竊聞朝廷論臣有不軌之事八謹陳其詳惟陛下垂察其一謂臣護衛踰額祖訓職掌條王府官軍不拘數目各王府皆然此姦臣枉臣一也其

二謂臣不當無事操練軍馬。祖訓兵衛條王教
練軍士遍數不拘。此姦臣枉臣二也。其三謂臣不
當於各衛選用官軍。祖訓職條王府武官千
戶百戶從王於所部軍職內選用。開奏直詣御前
頒降誥勅。此姦臣枉臣三也。其四謂臣私養韃鞨
健卒。本洪武中歸附處於北平。皇考命於護衛
歲給衣糧備虜。此姦臣枉臣四也。其五謂臣招致
各處異人術士養於府中。日夕論議爲非。竟無主
名。此姦臣枉臣五也。其六謂臣府中守禦四門不
當僭擬皇城守禦之制。更番甚嚴。祖訓兵衛條
凡王府守禦宿衛護衛均番。此姦臣枉臣六也。其
七謂臣宮至僭侈。此皇考所賜。祖訓營繕條
燕因元之舊。非臣僭越。此姦臣枉臣七也。其八謂
臣第二子高煦。過涿州擅笞驛官。此臣失教。然笞
一驛官。遂指爲臣不軌之迹。冤濫已甚。何以服天
下後世。此姦臣枉臣八也。且陛下與臣皆出太
祖高皇帝。孝慈高皇后。於屬最親。姦臣猶得誣以
極惡。則踈遠小臣。天下細民。欲真死地。可望雪理
耶。其不濁亂天下。傾危宗社。不已也。蓋今諸王之
中。臣序爲長。周齊湘代岷五府已去。獨臣未去。臣

去則楚蜀秦晉諸國不難去矣寧王無罪此又削其護衛譬諸人身手足皆去身能全乎伏望陛下鑒臣愚誠思宗社大計斷然不惑去此姦慝臣某頓首頓首罪黜都指揮僉事周成袁成張睦皆降燕是月 成祖傳檄言我 父皇奉天承運華夷一統長子立爲皇太子餘子封王各守藩屏以爲子孫萬代計不幸 皇太子薨逝秦晉二王繼殞父皇慈念皇太子遂立其次子爲皇太孫居東宮洪武三十一年閏五月十日 父皇賓天皇太孫即帝位我諸王不敢以叔道尊元臣子之情至矣盡矣帝年幼冲任用奸邪小人屏棄典刑殘害骨肉天變屢見恬不修省此皆齊尚書黃大卿左班文職等官讒佞于君恣行不道今天下但知有齊尚書等不知有皇帝皇帝被奸臣惑溺 父皇陵土未乾周代湘齊岷五王相繼竄流齊尚書等又使惡少謝貴等爲北平都司官張昺爲布政司官與本府長史葛誠合謀六月圍我王墻柵我王門殺我守王城卒諸軍披甲執杖鉦鼓叫呼聲震城野七月初旬且引兵入王城以都指揮張信言洩其奸不得已起兵擒獲逆賊謝貴等七月十六日

擒宋忠殺都指揮孫泰俞瑱八月十六日破雄縣
擒都督潘忠楊松二十五日破真定走耿炳文擒
左副將軍駙馬李堅右副將軍審忠右都督顧成
河托都指揮劉燧江陰侯吳高都督耿璘楊文以
遼東兵圍永平余直抵永平高等夜遁還兵大寧
都指揮房寬來降殺朱鑑都督劉貞陳亨守松亭
關不肯來降余襲破其營擒亨貞單騎遁去大寧
遂平未幾齊尚書黃大卿等左班文職又矯詔曹
國公李景隆領兵五十餘萬十月十六日攻北平
圍城甚急余以寡敵衆景隆大敗斬首十萬九
餘級景隆夜遁去余本 太祖高皇帝親子母

孝慈高皇后 皇太子親弟恭居諸王之長禮曰
父之仇不共戴天兄弟之仇不反兵今奸臣齊尚
書黃大卿等余必不與共戴天也故用 欽遵祖
訓統兵三十萬誅討左班文職奸臣傳檄天下藩
屏諸王暨官吏軍民咸使知朝廷左班文職奸臣
大逆不道我 父皇之仇爲子者義在必報也省
平夷衛十二月燕間遼東守將吳高削爵徙廣西
專命楊文守遼東庚申 成祖攻廣昌守將楊宗
以城降是月岷府典膳李英等伏誅薊州鎮撫曾

璿起兵攻北平不克死之駙馬都尉王寧謀叛幽
于其家某衛官張倫等率兩衛官軍南奔結盟報
國以練子寧為吏部左侍郎如瑞復為兵部尚書
初令武官襲替兵部會五府取旨是時掌中府事
駙馬都尉謝達署左府事孝陵衛指揮使黃鉉右
府都督僉事陳春掌前府事駙馬都尉耿璿掌後
府事駙馬都尉尹清省躬殿成殿在軋清坤寧二
宮間為退朝燕息之所置古經聖訓其中以尚父
丹書之旨夏書聲色宮室之戒命孝孺為銘以表
義為右府都督僉事遷肅王稜於蘭縣選其法
以中牟人楊本為錦衣衛鎮撫沅州人周拱元為
所鎮撫法司奏今歲論囚視往歲減十三畱守左
衛指揮同知李申伏誅籍其家叅贊大將軍軍務
高巍使燕署應天府事兵部郎中方賓謫戍廣東
以錢芹為行軍署都事茅大芳副都御史葉砥翰
林編修顏伯瑋沛胡儼桐城梁潛陽春知縣
庚建文二年春正月丙寅朔天下官來朝免賀
成祖攻蔚州守將王忠李遠以城降省翁源縣入
英德初置後湖祗候所二月降漢陽府為州丁酉
燕兵攻大同壬寅詔禮部尚書陳迪右侍郎黃觀

知貢舉翰林學士董倫太常少卿高遜志充考試
官右拾遺朱逢吉史官吳勤葉惠仲趙友士徐旭
張秉彝同考試官御史王度俞吉士監試官降南
雄府爲州省保昌縣令蘇松江浙人得官戶部甲
子改都察院爲御史府革十二道置察院一詔曰
頃以治獄煩興易御史臺號都察院與刑部分理
庶獄今賴宗廟神靈斷獄頗簡其更都察院仍漢
制爲御史府專糾貪殘舉循良匡政事宣教化爲
職省御史員定爲二十八人務爲忠厚以底治平
改都御史景清爲御史大夫以監察御史戴德彝
爲左拾遺以黃觀爲禮部侍中掌尚寶司事是月
韃靼可汗坤帖木兒瓦剌王猛哥帖木兒款北平
景隆率兵出紫荆關援大同 成祖自居庸關還
北平景隆遺書 成祖請息兵王答書索齊泰黃
子澄三月丙寅朔策試禮部貢士吳溥等一百一
十人制曰諸生蓋聞致治之主論治道之盛必以
唐虞三代爲準堯舜禹湯文武數聖人者其德厚
矣然所以本諸身發於政事施澤於民者其先後
始終亦可得而言歟夫由親以及疏篤近而舉遠
百王之所同也堯舜之時黎民於變時雍矣以親

則有象之傲臣則有共鯨之凶將聖人之化有所
弗及歟抑爲惡之人有不得而化者歟朕紹承大
統每思古先聖帝明王之治何稽何爲而可使家
給人足比屋有可封之俗行何善政而可使囹圄
空虛刑措不用歟圖治莫切於用賢而患賢才之
難致化民莫先於敦學而患禮樂之難興果何由
而可使野無遺賢而民皆樂於爲善歟茲欲使海
內皞皞熙熙如唐虞三代時致之必有其道施爲
必有其序諸生習於聖賢之說久矣其具著于篇
朕將親覽焉賜胡靖王良李貫等進士及第出

有差以靖爲翰林修撰改詹事府爲御史府賜御
史大夫宴於新署又賜監察御史衣人一襲令禮
部乙榜舉人署教諭訓導事者給俸三年入禮部
試試中計所教人得中鄉試就進士出身資格過
陞一級否從本級其下第而所教人中鄉試者與
實授九年通考稱職平常不稱職黜陟否仍署職
減俸十之五乙榜年未三十不願署教者聽省忻
城縣并入東蘭縣武臣犯法被黜者悉叛走降燕
燕盡復其故官夏四月景隆兵次德州郭英吳傑
等兵次真定約日合兵進攻北平先是上遣中官

賜景隆璽書及斧鉞渡江忽大風雷雨暴至舟破
盡沉諸江至是復賜景隆景隆益專恣紀律不嚴
號令煩數諸將易玩之辛丑成祖率衆渡馬駒
橋南駐武清癸丑景隆軍至河間先鋒叅將平安
至白溝河郭英等自真定移營保定期會於白溝
河成祖進至固安乙卯營中大雨平地水深二
尺己未成祖率衆渡白溝河平安伏精兵萬騎
邀擊成祖曰平安豎子往從吾出塞征胡識吾
用兵以故敢爲先鋒今日吾且破之使心膽俱喪
安驍勇善戰互有勝負俄都指揮何清陣動戰敗
被執安收兵還營景隆胡觀郭英吳傑等合兵六
十萬聯營白溝河藏火器一窠蜂揣馬丹地中人
馬遇之輒爛夜與燕兵大戰成祖從三騎殿後
迷失道下馬伏地視河流辨東西始知營在上流
倉卒渡河而北庚申成祖率衆渡河胡騎三百
叛降燕燕胡騎指揮省吉盡掩殺之是日景隆諸
軍進戰破成祖後軍房寬狼狽走成祖率衆
復戰驍將瞿能父子皆戰沒景隆麾諸騎兵乘敵
後成祖見張玉朱能丘福陣動急又見陣後塵
起曰敵繞出我後矣馳騎赴之戰甚力左右曰敵

衆我寡難與持久宜退就玉等併力景隆等呼噪
益進矢石俱發注如雨 成祖馬三易三被創矢
三服並射盡乃持劍奮擊劍又缺折急走登隄佯
麾鞭若招後繼者景隆等疑有伏不敢上隄而
成祖復率衆馳入陣陣動會旋風折大將旗景隆
軍大亂 成祖乘風縱火燔諸營郭英等潰而西
景隆潰而南委棄輜重器械孽畜萬萬計景隆璽
書斧鉞盡為燕所獲殺溺死者二十萬人 成祖
復追至月樣橋降十萬餘人景隆單騎走德州壬
戌 成祖遣人攻德州五月辛未景隆自德州奔
濟南癸酉燕將陳亨張信入德州奪軍餉百萬轉
掠濟陽儒學教諭王省死之叅贊高巍叅政鐵鉉
自臨邑入濟南丁丑 成祖率衆趨濟南巳卯景
隆出兵合戰城下敗績奔入城 成祖圍濟南攻
之急鐵叅政高叅贊徐將軍盛統兵高僉憲宋叅
軍張都統王女守王府校悉力防禦大挫燕衆辛
巳 成祖隄水灌濟南濟南人大懼鐵叅政曰無
恐計且破之不三日遁矣令登陴人皆哭呼曰旦
日且降盡輟守具出千人城外伏地請降又請退
兵十里無驚動城中人 成祖大喜是時 成祖

在軍逾年往來戰守甚苦僅得永平保定及北平
三府諸府縣旋破旋堅守不肯降至是聞濟南降
曰濟南中原要會得濟南斷南北即不下金陵畫
中原自守徐扈江淮遂下令退軍受降軍中大喜
呼萬歲鐵叅政懸鐵板城門上伏壯士闔堵中約
候成祖入城呼千歲即下鐵板拔橋乃遣人請
成祖入撫諭成祖乘肩輿張蓋率勁騎數人渡
橋直至城下城門開守埤者皆登城伏堵間成
祖比入門門中人即呼千歲鐵板亟下傷成祖馬
首成祖棄馬取從馬走走至橋橋下伏兵發斷
橋橋不可動成祖得過橋復合兵圍濟南鐵叅
政令守埤者罵成祖燕軍大怒攻益急鐵叅政
隨機應敵間出兵累敗燕兵是月都督僉事朱榮
棄樂城遁還京誅之六月增改詹事府官置資
德院八百媳婦入貢遣監察御史周觀政監徐州
兵是月遣尚寶司丞李得成使燕議罷兵以儀賓
魯瑄褚富署都督僉事秋七月李得成還自濟南
下獄既而釋之平安率兵二十萬進次單家橋欲
分兵出御河奪燕餉舟復德州高燧出軍良鄉安
兵不敢進省沔縣入襄城八月戊申濟南圍解是

月盛庸兵至德州逐燕將陳旭自德州遁歸北平承天門災詔求直言未幾乙字庫災改謹身殿為正心殿置學士一人罷華蓋文華武英殿文淵東閣大學士各設學士一人改方孝孺為文學博士九月承天門成改為臯門遂改午門為端門端門為應門前門為路門乙丑成祖至北平冬十月更定歷事監生選用法凡歷事一年為滿考分三等上者即授官次下者再歷一年復考考上者亦即授官次量材選授下還國子監讀書省兩當縣入徽州置威武中衛募健武克衛壯士兵部右侍郎盧淵有罪除名清遠戍卒羅義上書下獄既而釋之詔諸將無使朕負殺叔父名是月平安與燕兵戰華山斬燕將陳亨時安及吳傑駐定州盛庸駐德州徐凱陶銘城滄州相為犄角困北平滄州城潰凱銘督士卒修城成祖佯出攻遼東至通州循河而南渡直沽晝夜兼行至滄州城下列營凱等始覺倉卒收築城具出戰敗績入城守成祖攻破其東北凱及都督程暹都指揮趙許胡原李英張傑皆被執時降燕者數萬人北將譚淵夜殺降卒三千人凱等皆降赴北平封盛庸歷城

侯以鐵鉉爲山東布政使帝以濟南完守賞鉉等
却敵功命翰林陳檢討賜銀幣吏部魯主事頒誥
命封三代尋陞鉉兵部尚書官軍姜貴等五十四
人以濟南功陞官有差召景隆還赦不誅以盛庸
爲平燕將軍克總兵官節制諸軍鐵鉉參贊軍務
十一月庸駐德州成祖移直沽之舟至長蘆載
降獲輜重順流而北成祖自率衆循河而南庸
出兵襲後不克成祖遂至臨清移屯館陶掠大
名焚我軍餉十二月甲午成祖至汶上掠濟寧
庸鉉率兵躡其後營於東昌先鋒將孫霖營滑口
燕將朱榮劉江襲破霖都指揮唐禮被執霖走乙
卯成祖至東昌庸背城而陣燕擊其左翼不動
退而衝其中堅庸麾兵圍成祖數重成祖易
服奮躍馬出西南去燕軍爲火器所乘大敗庸兵
大呼噪奮擊殺燕大將張王丙辰復戰又敗燕軍
步卒先走庸乘之殺傷萬計北平震動成祖退
駐館陶庸飛檄真定滄德諸將水陸犄角邀成
祖歸路是月國子助教王紳卒是歲以徐實爲兵
部署右侍郎以陝西叅政劉季箎爲刑部左侍郎
湖廣叅議楊砥言事忤旨謫遼陽詔舉優通文學

之士以處士唐愚為翰林侍讀大理卿馬京坐事
謫 肅政按察司副使以鄒瑾為大理右寺丞
辛建文三年春正月辛酉朔凝命神寶成寶方一
尺六寸九分帝親定其文曰天命明德表正萬方
精一執中宇宙永昌先是帝在儲位嘗夢神人致
上帝命授以重寶元年使者還自西方得青玉於
雪山方踰二尺質理溫栗二年春正月帝郊祀宿
齋宮夕夢若有覩乃驚寤命玉人琢為大璽冬十
二月工成名凝命神寶至是以告天地祖宗為文
宣示遐邇百官稱賀大宴於奉天門頒賞四夷朝
使辛未大祀天地於南郊明日宴慶成群臣大歡
會賦詩詔成頒示天下歷城侯庸遣人來獻東昌
之捷詔諭天下丙子 成祖至北平丁丑享太廟
告捷二月乙巳 成祖復率衆南出巳酉至保定
庸合諸軍二十萬駐德州約吳傑平安出真定攻
北平加禮部尚書陳迪太子少保大理左右少卿
汪善聞良輔坐事調河南湖廣肅政按察司副使
以鎮江知府薛嵩左補缺胡閏為大理左右少卿
三月辛未庸兵至單家橋巳卯營於夾河辛巳
成祖率衆至夾河庸結陣甚堅 成祖掠庸陣陣

旁火車火銃強弩戰盾固匝不能動。成祖退庸
出千騎追襲。成祖即率萬騎步兵半之直薄庸
陣。庸陣堅不動。燕步卒攻左掖。騎兵擣中堅。庸始
麾諸軍力戰。斬燕大將譚淵。成祖復以勁騎掩
庸陣。後燕將朱能、張武等從。成祖合戰。庸軍火
器不及發。戰盾又中鐵積相牽。不能先後。遂却都
指揮莊得驍將楚智、皂旗張等皆陷陣。戰沒。是夕
戰酣。迫暮各斂兵入營。成祖以十餘騎逼庸營。
野宿。明日引馬鳴角穿營而去。上有詔。旨無使
余負殺叔父名也。諸將相顧不敢發一矢。成祖
既還營。復嚴陣約戰。成祖軍東北。庸軍西南。自
辰合戰。至未。兩軍相勝負。屢退屢進。將士皆疲。各
坐息。少頃復起。戰相持不退。忽東北風大起。塵埃
漲天。沙礫擊面。庸軍中昏暗不辨。咫尺燕兵大呼。
乘風縱左右翼橫擊。庸軍中大敗。成祖追奔至
滹沱河。庸走還德州。當是時。庸恃東昌之捷。輕敵。
謂此舉必破。北平將士咸携金銀釵器錦繡衣袍。
日破北平。張筵痛飲。至是盡為燕兵所獲。癸未。真
定諸將率師駐單家橋甲申。成祖率兵徑趨橋。
與平安等大戰。安擒燕將薛祿。祿脫走。吳傑平安

初欲與庸合勢比出真定聞庸敗又聞燕散遣健兒四出索餉遂進兵襲成祖降欽州爲縣省陽山縣入連州革鎮番衛是月罷兵部尚書泰太常卿子澄以謝燕閏三月乙未燕兵掠真定吳傑移軍滹沱河成祖令騎兵遏河上流步卒輜重從下流渡遇傑兵不戰傑移營藁城成祖亦至藁城戊戌合戰互有勝負己亥傑安列方陣西南燕攻其東北成祖以驍騎循河出其軍後大戰傑安發火器大弩射成祖下如雨矢集王旗如蝟毛安陣間縛樓高數丈安登望燕兵見戰勝大喜

麾諸軍力戰成祖見安啓樓率精騎直趨攻樓安見成祖馳至急下樓墜而走會大風發屋拔樹傑軍亦敗都指揮鄧馱陳鵬等皆被執安傑還真定己酉燕兵掠順德辛亥掠廣平癸丑掠大名是日貽書成祖謫斥泰子澄可罷兵不聽上書曰臣聞虞舜用辟首去四凶設湯之聖不吝改過皆帝王之盛美萬世所師法也臣奉藩以來今歷二紀栗栗不敢違越皆緣姦臣齊泰黃子澄懷莽操之逆圖志傾危於宗社造滔天之禍剪藩輔之親屢削諸王次及於臣誣直爲枉飾虛爲實加之

大惡冒以深誅發天下之兵殫府庫之財擠臣一家並寘死地臣嘗瀝忠懇號敷訴於天天益甚高畧無見聽夫小杖則受大杖則走臣雖至愚豈忍父子俱被無辜之戮而令陛下受枉殺親王之名哉故以兵自防誠非得已上賴天地宗廟之靈鑒臣忠誠憫臣非罪俯垂庇佑大軍之至每自摧明然臣不敢為喜恒用傷悼誠念此皆皇考所養兵民而姦臣一旦盡驅之白刃之下使殘血成川曝骸蔽野嗚呼冤哉彼實何罪故夙夜拳拳秉誠摠敬籲天地籲祖考冀開發聖明助震威斷早戮姦賊用除禍本庶幾以清朝廷以安宗社以全親族以息兵民而天下有太平之望比聞姦臣恭子澄皆以竄逐于外臣一家長幼皆欣喜舞忭有更生之慶謂陛下日月之明已宣雷霆之威已震朝廷可以遂清宗社可以綏安親族可望保全生靈可望休息天下可望大平帝舜之去四凶成湯之改過不吝陛下兼而有之然臣猶未能盡釋於心者初聞齊黃被黜即以徧告三軍將士曰明天子已洞察我之非辜而去權姦矣旦夕必下寬貸洗雪之恩吾與若等可以解甲而休帖席而卧矣將

士皆曰誠所願見但慮非出誠心而姦臣姑爲退
避之計以弭我耳然我豈可輒自弛以束手就擒
哉如其果出誠心則吳傑平安盛庸之衆當悉召
還而今猶聚境上侵迫不已則是姦臣之身雖出
而姦臣之計實行臣思其言恐亦人事之或然者
也夫聖人感人至誠而已至誠可孚豚魚而况人
乎陛下推誠待下誰不悅從若徒示以去姦臣之
名而實仍用姦臣之計此非獨欲撤陛下之藩籬
將遂傾陛下之堂室莽操之事前鑒甚明此不待
智者而後知也姦臣之計臣前書陳奏已詳如陛
下不信但試察其所行所言果忠於朝廷乎果其
自爲乎惟陛下明之於心度之於理參之於古驗
之於今力斷而行之無終爲儉邪所蔽天下幸甚
宗社幸甚非獨臣一家一國之幸也書至上召孝
孺視書對曰今諸軍大集燕兵久羈大名暑雨爲
沴不戰自罷急令遼東諸將入山海關攻永平真
定諸將渡蘆溝橋擣北平彼顧巢穴歸援我以大
軍躡其後必成擒矣我固欲緩之彼奏適至宜且
與報書往返逾月彼心解而衆離我謀定而勢合
上曰善立命孝孺草詔言罷兵遣大理少卿薛嵒

持報燕又爲榜諭數千言刻印萬張授崑令至燕
軍中密散諸將士崑見成祖問上意云何崑曰
朝廷言殿下旦釋甲暮即旋師成祖怒曰是給
我也崑惶恐不能對燕將士譁欲殺崑崑戰慄流
汗伏地成祖令護崑南還翰林侍讀唐愚士卒
夏四月崑至自燕軍言燕軍強盛孝孺惡之曰此
爲燕遊說也五月吳傑平安盛庸出兵扼燕餉道
成祖遣其指揮武勝奉書於朝曰比荷聖明允臣
所奏特遣大理少卿薛崑下詔軍中諭以偃兵息
民雖臣將士不能無疑於權姦之欺臣之父子蓋
已欣戴陛下之仁矣而崑歸未十日吳傑平安盛
庸頻疊發兵絕臣糧運要殺臣將校數百人臣將
士守臣約束不敢赴鬪而彼必欲求釁略不見捨
與比所下詔旨背馳誠有以中臣將士之所疑孤
臣父子之所欣幸也如謂朝廷息兵之命傑等有
所不知不聞薛崑之來往復皆經其軍中其可謂
不知不聞耶此皆奸臣之所爲而陛下深居九重
有所不知不聞也臣之所恃者陛下至尊至親也
今爲姦臣所惡陛下雖有憐之之心而不能見庇
則臣自救之計敢一日而忽哉臣之忠誠計薛崑

歸必能詳達。但前日詔旨如此，今日姦臣矯制如彼，外情洶洶，不敢不聞。伏惟擴明奮斷，以固皇業，以安天下。斯臣亦有保全之望。臣無任戰兢俟命之至。上覽書曰：燕王本皇考孝康皇帝母弟，於朕為叔父，柰何必用兵為也？召諭意。孝孺孝孺對曰：陛下即欲罷兵，兵一散即難復聚。彼或長驅犯闕，何以禦之？今軍聲大振，不日有捷書來聞。願陛下無惑甘言，勝等縛下錦衣獄。改利州直隸廣西調刑部左侍郎王良為浙江肅政按察使。六月辛酉，成祖遣李遠等南掠餉道。王申遠等至濟寧。

又至沛縣，焚餉舟萬艘，河水盡熱，魚鱉皆死。漕卒散走京師。大震。壬午，都督袁宇率兵三萬邀擊遠，中伏敗績。殺觀海衛指揮張壽。壽飲中言國事危急，坐妖言論死。遣太僕少卿祝孟獻使朝鮮市馬。秋七月己丑，彰德守將都督趙清禦燕兵，戰敗。癸巳，燕兵破尾尖寨。丁酉，平安邀擊燕將劉江於平村。戊戌，遣錦衣衛千戶張安遺燕世子書，先是孝孺門人林嘉猷嘗被成祖召至北平，居邸中久之。知高煦及三郡王不睦於世子，屢讒於父。內臣黃儼素奸險，世子惡儼儼曲事三郡王。三郡王與

世子守北平高煦從 成祖軍中時時傾世子孝孺言於帝曰兵家貴間燕父子兄弟可間而離也帝問云何孝孺言其故帝曰柰何間之孝孺曰世子見疑必北歸而吾餉道通矣帝曰善立命孝孺草書貽世子令歸朝且許王燕地世子得書不啓封并安致 成祖所三郡王儼先已馳使告 成祖世子且反 成祖疑之問高煦高煦曰世子故與太孫善厚語未竟世子書至 成祖曰嗟乎幾殺吾子壬寅大同守將都指揮房昭引兵入紫荆關掠保定下邑駐易州西水寨約期進攻北平

成祖聞之即日還兵援保定限僧道出入五畝遂勅禮部曰朕聞釋道之教其來久矣本以清淨空幻爲宗超世離俗爲事近代以來俗僧鄙士貪著自養殖貨富豪甚至田連阡陌本欲以財自奉然利害相乘迷不知覺既有饒足之利必受官府之擾况因此不能自守每罹刑憲非惟身遭慘辱而教亦墮焉夫佛道本心陰翊王化其助弘多至於末流所習本乖蠹蝕教門致使訕毀肆行貽累厥初朕甚憫之原其害教之端實自田始今天下寺庵宮觀除原無田產外其有田者每僧道一人各

存田五畝免其租稅以供香火之費餘田盡入官
有佃戶者佃者自承其業無佃戶者均給平民如
舊田不及今定數者不增若有以祖業及歷代撥
賜爲詞告言者勿理如原係本朝撥賜者不在此
例凡僧道一應丁役並免其有自相告訐爭訟非
干軍民者聽其本教衙門自治若致傷人命及干
軍民詞訟者仍聽有司受理其入有司理訟者不
許仍服僧道冠服洪武年間已有清理及開設教
門榜文當申明遵守教規化緣者不在禁限非奉
朝命不許私竊簪剃年未五十者不許爲尼及女
冠嗚呼多藏厚亡老氏攸戒除從去累大覺所珍
利欲滅則善心生善人多則風俗美欽茲定制永
底太平定銓選法通類覆奏附選八月丁巳 成
祖渡滹沱河留其將孟善守保定丙子真定總兵
遣都指揮韋諒率兵餉饋援房昭丁丑 成祖圍
西水寨遣其別將朱榮圍定州是月老撾入貢放
還不識字人材及年未三十者改泗城州直隸廣
西九月甲辰 成祖攻定州省恭城縣降平樂府
爲州冬十月丙辰真定諸將都指揮花英鄭琦率
步騎三萬援西水寨 成祖自定州馳還英等列

陣義眉山山下。成祖潛兵出陣後合戰敗績英琦及都指揮王恭指揮詹忠等被執房昭韋諒走西水寨遂破。成祖還北平是月翰林修撰王良卒。十一月遼東總兵官楊文圍永平燕將郭亮固守不能克文出兵攻昌黎遇燕將劉江戰敗指揮王雄等七十一人皆被執平安戰敗燕將李彬於楊村鞞鞞通燕寇鐵嶺皇少子文圭生十二月丙寅。成祖復出北平置神武中錦川鎮淮衛勅駙馬都尉梅殷鎮守淮安初置豐沛軍民指揮司詔禁內臣出使侵陵吏民吏部試翰林史官楊士奇等以

次錄用復留士奇於翰林以程通為遼府左長史龔泰為禮科都給事中是歲。太祖高皇帝實錄。成改程本立為江西肅政按察副使以兵部武選郎中古朴為右侍郎起復陳洽為文選郎中以徐真馬溥為左右府都督僉事克參將率偏師北進。建文四年春正月德州裨將都指揮葛進率步騎萬人為先鋒渡滹沱河遇燕將李遠於藁城戰敗平安率兵十萬復通州不克指揮賈榮等兵敗于衡水。成祖攻破東阿戊戌遂破東平指揮詹璟被執吏目鄭華死之燕攻汶上都指揮薛鵬被

執唐戍燕兵攻沛縣指揮王顯降燕知縣顏伯瑋
及主簿唐子清典史黃謙死之置四川英武前衛
是月晦 成祖至徐州二月諸軍皆營於濟寧餉
卒遇敵于鄒縣潰走甲戌 成祖攻徐州城中兵
出戰敗績改向武都康州直隸廣西省武林縣入
富勞更定勲階尚書為特進資政上卿侍中資政
卿侍郎資政亞卿郎中資政中大夫員外郎贊政
大夫給事中嘉政中士始置京衛武學教授一人
啓忠等齋齋訓導二人三月甲申 成祖自徐州
進攻宿州平安統精兵四萬為先鋒追躡 成祖
壬辰 成祖渦河平安兵進至濉河遇伏戰敗胡
騎指揮火耳灰哈三帖木兒皆被執平安等兵駐
宿州燕將譚清斷徐州餉道燕兵攻破蕭縣知縣
鄭恕死之夏四月甲寅平安兵營於小河亘十餘
里張左右翼緣河而東遇 成祖騎兵合戰斬其
將陳文再戰又勝斬其將王真 成祖督戰急幾
為安槊所及安馬蹶弗得前燕番將王麒躍馬入
陣援 成祖得脫裨將丁良朱彬被執是役也燕
軍中大懼議且還北平安諸軍營小河南燕兵
據河北甲戌大戰齊眉山自午至酉會大霧斂兵

還營乙亥燕諸將欲還北平不敢顯言輒請退屯
小河東就麥觀隙而動成祖不聽朱能鄭亨又
力言渡河非計諸將多不肯從成祖曰欲渡河
者左不欲渡河者右諸將多趨左成祖大怒曰
任汝所之諸將始不敢言何福引兵會平安燕軍
中益懼成祖數日不解甲矣丁丑平安營於靈
壁成祖遮其餉道何福等出壁來援敗績辛巳
大戰又敗績左右副總兵都督陳輝平安左右叅
將都督馬溥徐真都指揮孫成等三十七人內臣
四人禮部侍郎陳性善大理寺丞彭與明欽天監
副劉伯完指揮王貴等一百五十一皆被執何福走
吐蕃寇陷保寧所五月己丑成祖至泗州守將
周景初降燕辛卯盛庸率馬步騎數萬戰艦數千
列營淮南成祖營淮北燕將丘福朱能潛濟出
庸後庸走盡棄其戰艦軍資成祖遂渡淮至盱
眙諸將分屯鳳陽淮安以遏燕兵成祖欲從淮
安取道渡江以駙馬都尉梅殷守禦嚴備恐攻之
不克欲從靈壁出鳳陽渡淮知府徐安毀橋斂舟
不得渡遂徑趨揚州庚子成祖至天長揚州指
揮王禮千戶徐政張勝江都知縣張本執守將崇


剛監察御史王棖降燕。成祖遂至揚州。高郵指
揮王傑降燕。成祖至儀真。詔天下勤王曰：燕
勢將犯闕，中外臣民坐視予之困苦而不予救乎？
凡文武吏士宜即日勤王，共除大。宗社再安，予
不敢忘報。詔下京城內外臣民慟哭。遣刑部侍郎
金禮部侍中黃觀、國子祭酒張顯宗、翰林修撰
王叔英等分道徵兵入援。召黃子澄還蘇州府知
府姚善、寧波府知府王璉率師勤王。遣慶成郡主
至。成祖所議割地罷兵不聽。是月遼東兵潰於
直沽。理問徐讓、縣丞衛健使燕還，以爲衛鎮無軍。
前差遣刑部尚書侯太轉餉維安。燕兵掠鳳陽
種馬。六月癸丑朔，成祖至浦子口。諸將盛庸等
迎戰，敗之。成祖欲且議和，北還。會高煦引胡騎
至，大喜。遽起披甲仗鉞，見高煦撫其背，令努力。高
煦殊死戰。諸軍小却，上急遣都督僉事陳瑄率舟
師援庸。瑄乃降燕。乙卯，成祖遂渡江。盛庸率海
艘出高資港，嚴陣以待。成祖奮力先登，大戰庸
敗走。鎮江守將童俊降燕。庚申，成祖營龍潭。上
遣景隆都督王佐、尚書茹瑄至龍潭，再議割地罷
兵。分遣諸王守京城諸城門。景隆等見成祖伏

地納款頓首稱臣呼萬歲不已壬戌景隆等歸言
成祖必欲得齊泰黃子澄輩上令景隆等再往言
諸臣皆竄逐外郡俟縛至遣來景隆等惶懼不敢
行上令諸王與景隆等偕行成祖曰勿多言不
得奸臣吾必不已諸王歸上會群臣慟哭或勸上
且幸浙或曰不若幸湖湘孝孺請堅守京城以待
四方之援議不決遣魏國公徐輝祖開國公常昇
分道出師禦戰甲子遣人齎蠟書四出促勤王兵
為燕遊騎所獲乙丑成祖至金川門谷王穗開
門成祖遂入城上手誅徐增壽於左順門又欲
誅景隆不果諸內臣譁言不如遜位去須史宮中
火起傳言帝崩成祖為發喪治葬翰林文學博
士方孝孺等不屈死之夷其族成祖即皇帝位
革除建文年仍稱洪武以故洪武有三十五年或
曰帝發火宮中即削髮為僧入蜀或曰去蜀未幾
入滇南常往來廣西貴州諸寺中天順中出自滇
南呼寺僧曰我建文皇帝也寺僧大懼白官府迎
至藩堂南面跣足坐地自稱朱允炆曰胡濙名訪
張儼備實為我衆聞之悚然聞於朝乘傳之京師
有司皆以王禮見比至入居大內以壽終葬西山

不封不樹帝嘗賦詩曰牢落西南四十秋蕭蕭華
髮已盈頭乾坤有恨家何在江漢無情水自流長
樂宮中雲氣散朝元閣上雨聲收新蒲細柳年年
綠野老吞聲哭未休士庶至今猶能道之或曰帝
之生也頂顱頗偏高皇知其必不終嘗匣髡鎚
戒之曰必嬰大難乃發此以故遂爲僧去又曰建
文君幼秀穎能爲詩高皇使賦新月曰誰將玉
指甲抓破碧天痕影落江湖上蛟龍不敢吞帝曰
必免於難

論曰余好問先達建文時事皆爲余言建文君寬
仁慈厚少好文章禮樂不喜任律法操切人比即
位得方孝孺專意行周官法度輒改高皇帝約
束靖難兵起不爲意即有敗狀來聞亦輒謂直多
發兵盪平在旬朔間耳諸大將統重兵北進者又
多懷貳心以故成祖至江上不戰而潰余至建
業聞之江上老人曰成祖乃天授建文君何尤
建文君金陵詩曰是日乘輿看晚晴葱葱佳氣滿
金陵禮樂再興龍虎地衣冠重整鳳凰城後至貴
州金竺長官司羅永菴嘗題詩壁間其一曰風塵
一夕忽南侵天命潛移四海心鳳返丹山紅日遠

龍歸滄海碧雲深紫微有象星還拱玉漏無聲水
自沉遙想禁城今夜月六宮猶望翠華臨其二曰
闕罷楞嚴磬懶敲笑看黃屋寄曇標南來瘴嶺千
層迴北望天門萬里遙欵段久忘飛鳳輦袈裟新
換袞龍袍百官此日知何處惟有群鳥早晚朝



國記終

子履進校正

